

PAGTULON-AN 2 - Genesis 4:1-15

## Ang Unang mga Bata sa Dalan sa Kinabuhi

**KATUYOAN :** Sa pagpakita nga kon walay pagtoo dili gayud mahimo ang pagpahimuot sa Dios.

Inyo ba nga matagnaan kon unsa ang labing matahum nga gasa nga gikan sa Dios diha sa panimalay? Dili kay bag-o nga balay o awto kondili ang usa ka bata nga bag-ong natawo sa panimalay. Walay si bisan kinsa nga makahatag niini gawas sa atong Langitnon nga Dios.

Samtang magapanaw kita sa *DALAN SA KINABUHI* atong makita ang daghang mga kabataan apan karon atong hulagwayon kadtong labing una nga natawo dinhi sa kalibutan. Nakita ninyo nga si Adam ug Eva wala moagi sa pagkabata kay sila gibuhat sa Dios ingon nga mga dagko na nga tawo, lalake ug babaye.

Human sila nakasala, si Adam ug Eva gipagawas sa Tanaman sa Eden diin kaniadto didto sila gibutang sa Dios. Kinahanglan sila magsugod ug bag-o nga panimuyo. Genesis 3:23,24. Usa ka adlaw may miabut sa bag-o nga puloy-anan, ang labing matahum nga gasa sa Dios. Si Eva nakaingon, "Nakabaton ako ug usa ka lalake tungod sa panabang ni Jehova." Genesis 4:1. Tingali siya naghunahuna nga mao na kini ang gisaad sa Genesis 3:15, nga maoy magabuntog kang Satanas. Gitawag niya ang bata sa ngalan nga Cain.

Wala madugay aduna na sa'y laing batang lalake nga natawo. Gitawag siya sa ngalan nga Abel. Busa karon aduna na kitay duha ka mga bata sa *DALAN SA KINABUHI*.

Inyo ba nga nahinumduman ang bersikulo nga atong natun-an sa Pagtulon-an 1 nga, "Adunay dalan nga daw matarung alang sa usa ka tawo..." Sa inyo nga hunahuna asa ba niining mga dalana ang pagapilion sa mao nga mga bata? Si Adam ug Eva nagpahimangno kanila sa paagi sa paghimo sa halad nga inihaw aron mamatud-an ang ilang pagtoo sa pagsunod sa Dios. Walay mga bag-ong balaod nga gihatag niining duha ka batang lalake nga lahi sa mga balaod sa panahon ni Adam ug si Eva. Ang labing gikinahanglan mao nga sila magasimba sa Dios sumala sa iyang ginatudlo.

Si Abel nahimo nga magbalantay sa kamero samtang si Cain nahimong mag-uuma sa yuta. Ang panahon miabut sa diha nga ang maong mga bata may panuigon na sa pagpili sa ilang kaugalingon nga dalan diin ilang pagasubayon. Kini nga panahon moabut sa usa ug usa kanato. Ang atong ginikanan dili makapili sa dalan alang kanato sumala sa ilang nahimut-an.

Miingon si Cain, "Tan-awa kining mga matahum nga prutas sa kayutaan, nagtrabaho ako pag-ayo sa paglimpio niini ug siguro na lang nga ang Dios mahimuot sa akong halad." Nahimuot ba ang Dios sa buhat sa mga kamot ni Adam ug Eva? Wala, dili sa mga dahon nga ilang gihimo nga tapis. Matawag nato nga ang halad ni Cain mga *binuhatan sa iyang kamot*.

Si Abel, sa lain nga paagi, nagkuha ug kamero ug iyang gipatay ug gibutang labaw sa halaran ingon nga halad sa Dios. Iyang gidala ang halad inihaw susama sa gipakita sa Dios ngadto kang Adam ug Eva.

Si Cain ug Abel mga makasasala ba? Oo, kay sila nangatawo nga mga makasasala. Bantayi, atong tan-awon kon unsa ang gidangatan sa ilang mga halad. Gidawat sa Dios ang halad ni Abel apan ang halad ni Cain wala Niya dawata. Si Cain nasuko pag-ayo ug gipatay ang iyang igsoon nga si Abel. Nahimuot ba ang Dios sa gibuhay ni Cain? Wala, kay ang Dios nagsilot kang Cain pinaagi sa pag-abog kaniya gikan sa ilang panimalay ngadto sa halayo aron magiatagaw sa lain nga mga kayutaan tungod kay dautan ang iyang nabuhat. Genesis 4:6-16. Kining duha ka bata nagatubo sa mao ra nga panimalay ug gitudloan sa mao ra nga kamatuoran. Ang kalainan mao nga si Abel mitoo o may pagtoo niadtong ginatudlo kaniya. Pinaagi sa ilang mga lindhokan ilang gipaila kon unsa ang anaa sa ilang kasingkasing.

Nakita na nato kon unsa kadautan ang walay pagtoo. Kini magahatud ngadto sa kasuko, panimbong, pagpatay, pagpamakak, ug sa katapusan sa makalilisang nga silot nga mao ang pagkahimulag. Genesis 4:8-12. Ang pagsalig o pagtoo, nagadala ug kalinaw ug pagkamatarung kang Abel ug ang Dios nagpamatuod nga bisan kon patay na si Abel karon nagasulti pa gihapon. Hebreohanon 11:4.

Ang Dios nag-ingon nga kon walay pagtoo dili mahimo ang pagpahimuot Kaniya.  
Hebreohanon 11:6.

Bisan kon ania kita nagkinabuhi niining *Panahon sa Grasya* o bisan pa sa unsa nga panahon, ANG PAGTOO gikinahanglan aron ikaw pagadawaton sa Dios. Ang Dios nagsud-ong sa halad ni Abel ug pinaagi sa pag-ula sa dugo kadto nagapakita sa Ginoong Jesu-Cristo, ang Kamero nga gipatay sa wala pa matukod ang kalibutan. 1 Pedro 1:19,20. Karon dili kay atong ipakita ang atong pagtoo pinaagi sa pagdala ug kamero diha sa halaran kondili ang pagduol sa Ginoong Jesu-Cristo ug pagdawat Kaniya nga atong Manluluwas.

Ug karon atong nakita ang kamatuoran sa mao nga bersikulo, "Adunay dalan nga daw matarung." Si Abel misubay sa matuod nga dalan apan si Cain mipili sa dili husto nga dalan sa nagapanaw sila sa *DALAN SA KINABUHI*. Ang Biblia nagatudlo kanato nga adunay dagha bisan pa gani karon nga nagasunod sa dalan ni Cain. Judas 11. Sila mao ang nagapahilayo sa Dios. Sila mao kadtong nagasalig sa ilang mga binuhatan alang sa ilang kaluwasan. Bisan unsa ang mahimo sa atong kaugalingon nga mga kamot ug lawas dili makadala ug kaluwasan alang sa atong kalag.

Karon kon gusto nimo nga mapamatud-an ang imong pagtoo, duol sa Ginoong Jesu-Cristo ug suginli Siya nga ikaw mitoo nga Siya namatay alang sa imong mga sala ug Siya magahatag kanimo sa langitong pagkamatarung.

**SAG-ULOHON: Hebreohanon 11:6. Ug kon walay pagtoo dili gayud mahimo ang pagpahimuot Kaniya. Kay bisan kinsa nga magaduol sa Dios kinahanglan magatoo sa iyang pagkaanaa ug nga Siya magabalus ra sa mga magapangita Kaniya.**

PAGTULON-AN 2 - PAGATUBAGON

1. Ihatag ang mga ngalan sa labing una nga duha ka mga bata sa *DALAN SA KINABUHR*  
Genesis 4:1,2 \_\_\_\_\_
2. Unsa man ang trabaho ni Abel? Genesis 4:2 \_\_\_\_\_
3. Unsa man ang trabaho ni Cain? Genesis 4:2 \_\_\_\_\_
4. Ngano man nga ang Dios wala mahimuot sa halad nga gidala ni Cain? Hebreohanon  
11:6 \_\_\_\_\_
5. Ngano man nga ang Dios nahimuot sa halad nga gidala ni Abel? Hebreohanon 11:4  
\_\_\_\_\_
6. Ngano man nga ang halad ni Abel labaw pa kay sa kang Cain? Hebreohanon 9:22  
\_\_\_\_\_
7. Napamatud-an ni Abel ang iyang pagtoo pinaagi sa iyang gidala nga halad ug siya  
nahiuon ingon nga tawong \_\_\_\_\_  
Hebreohanon 11:4
8. Ang halad ni Abel naghulagway sa \_\_\_\_\_ nga  
magakuha sa sala sa kalibutan. Juan 1:29
9. Karon madawat nato ang pagkamatarung pinaagi sa pagtoo diha sa \_\_\_\_\_  
ni Jesu-Cristo. 1 Juan 1:7
10. Paghimo og hulagway sa halad ni Abel ug hulagway usab sa krus diin si Cristo nahimo  
nga nahimo nga halad tungod sa sala.
11. Isulat nga sinag-ulo ang Hebreohanon 11:6. \_\_\_\_\_  
\_\_\_\_\_  
\_\_\_\_\_  
\_\_\_\_\_